

**Dumonda da la fracziun da l'Allianza dal Center concernent la Strategia da forza idraulica – co vinavant?
(emprim sutsegnader Sax)**

En il chantun Grischun ha la forza idraulica ina fitg gronda impurtanza: Cun ina produziun d'electricitad da 7993 GWh furnescha la forza idraulica grischuna ina contribuziun considerabla a la segirezza dal provediment. En quest connex produceschan las circa 700 ovras idraulicas en Svizra 58,3 pertschient da tut l'electricitad, quai sin basa da l'aspectativa da produziun media. Er ord vista economica ha la forza idraulica ina fitg gronda impurtanza per il chantun Grischun e per las vischnancas. Ils proxims onns scadan en il Grischun las concessiuns d'insaquantas ovras idraulicas «pli grondas». Sin fundament da quai ha il Cussegl grond tractà en la sessiun da favrer 2022 la Strategia da forza idraulica 2022–2050 (protocol dal Cussegl grond da la sessiun da favrer 2022, p. 641 ss.; missiva da la Regenza al Cussegl grond, carnet nr. 9/2021–2022, p. 9: Strategia da forza idraulica dal chantun Grischun 2022–2050). Il punct central dal project è stà, co ch'ins duai proceder cun las concessiuns scadentas (uschenumnada strategia da return dals implants), cun las participaziuns colliadas stretgamain cun questas scadenzas (uschenumnada strategia da participaziun), cun l'exploziun d'energia (uschenumnada strategia d'exploziun) sco er cun la gestiun respectivamain cun il mantegniment d'implants electrici (uschenumnada strategia da gestiun). Las vischnancas (concessiunarias) han la suveranità en dumondas da las auas (art. 83 al. 2 CC) e decidan autonomamain en dumondas dal dretg da las auas. Ellas pon dentant profitar da la strategia chantunala da return dals implants.

Sut l'aspect da la Strategia da forza idraulica ch'è vegnida deliberada avant passa 2 onns, drizzan las sutsegnadras ed ils sutsegnaders las suandantas dumondas a la Regenza:

1. Vesa la Regenza – sin basa dals implants ch'èn vegnids returnads fin ussa dapi la deliberaziun da la Strategia da forza idraulica 2022–2050 – in basegn d'agir legislativ per pudair realisar la strategia?
2. Co vegni garantì en il rom da las tractativas terminadas, currentas e futuras, che mintga vischnanca concessiunaria respectiva possa fixar sia strategia en moda autonoma, q.v.d. independentamain da la strategia chantunala?
3. Tenor la strategia d'exploziun duai vegnir installada – ultra da la Grischelectra SA – in'ulteriura societad d'exploziun sco plattafurma, sur la quala l'electricitad vegn vendida. Co ha la Regenza l'intenziun da cuntinuar cun la fundaziun e cun l'installaziun da questa societad d'exploziun?
4. En il rom da la strategia areguard ils implants e lur gestiun ha la Regenza empermess – en il rom da la Strategia da forza idraulica – da fundar ina societad da gestiun orientada a l'inschigneria. Il parlament ha collià differentas aspectativas cun questa orientaziun, uschia che la dumonda s'impona, en tge furma che la Regenza persequitescha vinavant questa strategia?

Cuira, ils 5 da december 2024

Sax, Cramer, Zanetti (Sent), Beeli, Berther, Bettinaglio, Binkert, Brunold, Bürgi-Büchel, Caluori, Collenberg, Danuser (Cazas), Derungs, Föhn, Furger, Gansner, Haltiner, Kohler, Lamprecht, Loepfe, Maissen, Mani, Messmer-Blumer, Michael (Donat), Righetti, Said Bucher, Spagnolatti, Tanner, Tomaschett, Ulber